

松崖集

坤

年譜

家狀

行狀

謚狀

墓碣銘

神道碑

還墟碑

贊

請謚書

祭文

祝文

跋

~20  
2459  
2止

120  
2459  
2





2459止  
20  
2459  
卷2止

松崖集卷之三

附錄一

年譜

公姓朴氏諱汝龍字舜卿系出沔川

**辛丑**

皇明 世宗皇帝嘉靖二十年

國朝 中宗 大正 三十六

年 十二月十五日公生於海州立巖村

公之先自五世祖諱諶以典書出為海西按使  
秩滿卜居立巖耕釣自娛引老不起子孫因世  
居之至是公乃生焉

**壬子**

三十一年

國朝 明宗 大正 七 年 〇 十二 歲

五月丁外憂





癸丑

三十二年

明宗大王十三年

七月丁內憂

乙卯

三十四年

明宗大王十五歲

服闋

丁巳

三十六年

明宗大王十七歲

就外傳入學

公連喪父母零丁無依一日忽自奮曰苟不力學何以爲人遂徒步從師於數十里地不以飢寒而少懈時以乾醬和水救飢日夜不輟講誦文義日進

己巳

皇明 穆宗皇帝隆慶三年

國朝宣祖大王二年

九歲

聘室清風金氏

叅奉德溫之女

庚午

四年

宣祖大王三十歲

冬就學栗谷先生

先生以校理辭歸海州野頭村公始就學先生愛公天資近道授以性理之書公勵志力學同門咸推重焉

十二月子榮生

辛未

五年

宣祖大王四十一歲

六月陪先生游賞石潭

先生與諸生往石潭游賞川石想像武夷命名九曲而作歌遂有卜居之志公亦有從先生移築之意遂占松崖溪上○載寧之文巖水口之內金城鎮之西有兩址相距百有餘步居人相



傳先生居其上松崖居其下而有五層石臺先生嘗作亭其上名曰花巖而是年春先生來居之過半年後還花石亭公獨居三年因賊患歸于海州云

**壬申**

六年

宣祖大王十五年  
○三十二歲

發司馬兩試解

**癸酉**

皇明

神宗皇帝萬曆元年

宣祖大王六年  
○三十三歲

二月中司馬兩試

**丁丑**

五年

宣祖大王十年  
○三十七歲

築室松崖溪上

時先生辭官歸石潭築室於隱屏之北公為其從學移家于松崖距先生聽溪堂只隔一小崗

逐日從學講明義理因以松崖為號

**戊寅**

六年

宣祖大王十一年  
○三十八歲

初立隱屏精舍

公鳩村甚力初立精舍於隱屏之北為藏修之所以大隱屏之義扁曰隱屏精舍寓其宗仰考亭之意蓋從先生之命而為之也

**己卯**

七年

宣祖大王十二年  
○三十九歲

石潭語錄成

公常侍先生左右疑必問問必有記名曰語錄舊有上下篇而兵火之後逸其上一半亦有禮解而并逸無傳

**辛巳**

九年

宣祖大王十四年  
○四十一歲

先生書托朱子祠享事



先生嘗擬翔建朱子祠以靜菴退溪二先生配  
享仍定規約而以承 召未遂付書於公曰廟  
材須善藏而租布則斂散以爲他日之用石潭  
農庄諸事願入思看護云公之見重於先生於  
此可見也

除 厚陵叅奉

先生秉東銓以卓行首舉公爲 厚陵叅奉而  
與公書曰爲薄宦別泉石固知其非願而 厚  
陵往來之時可得源源故如是耳云云

**甲申**十二年 宣祖大王四十四歲 正月哭栗谷先生

公服心喪三年

**乙酉**十三年 宣祖大王四十五歲 陞奉事

**丙戌**十四年 宣祖大王四十六歲 十月建廟于石潭奉

安朱文公位板殿享靜菴退陶二先生

遵先生遺意也後夢見先生先生述大學之旨  
書贈公公不勝感慕起寫先生隱屏精舍約束

**丁亥**十五年 宣祖大王四十七歲 發明經試解

**己丑**十七年 宣祖大王四十九歲 上書牛溪先生稟

先生文集事

牛溪答書曰尊先生文集初欲奉邀尊之同門



中三四公于溪廬與之共輯草冊矣皆有故未  
來故茲以送于金希元以請編次而亦未始事  
極以爲憂切願尊公公餘勤赴此會以成之不  
勝至祝

**庚寅**

十八年

宣祖大王二十三年○五十五歲

冬先生文集草本成

公編次文集牛溪抵書曰示文集編摩事幾已  
就緒不勝欽贊歎服無已也

上書牛溪先生質問處崔永慶事

崔永慶之敗牛溪有遣問之事公以書質問曰  
崔永慶致敗乃其自取則先生之待之者無乃

或涉於過厚乎牛溪答曰示喻崔事令人竦謝  
此君雖有趨向之殊而與鄙人交道未盡絕所  
以令豚犬問之矣及其晚年哭子沈湎麴蘖因  
失常性收繫之日但存形骸顛倒錯亂殆不足  
責但以舊情遣問而已○牛溪年譜云崔永慶  
始爲兩賢所許後與潑汝立仁弘等相比毀詆  
兩賢至謂朴淳鄭澈必梟示然後國事可爲云  
其狼狽至此而先生猶待以故舊之道蒙放之  
日遣子往慰及聞其死送米賻喪舜卿以書來  
質云



辛卯

十九年

宣祖大王二十四年〇五十一歲

校讎先生文集

時公呈書牛溪稟以刪削牛溪答書曰摩尼青詞刊去之喻極是伏願割落之幸甚至如李潑了書題目不書其字而以答李潑書之不以朋友之例待之其書論東西甚詳斥李潑心術甚峻今畱巢中使千載之下知尊先生已看破此人心術豈不美歟○後牛溪先生又書曰尊先生詩集殊以未精選為憂也朴守菴尊文學問見識殆非近世人物切願躬詣請以精選如何又書曰日記則最多格言可以垂之于後百世

之下可以見斯人之為青天白日極為關係然登木則必至流傳恐致大禍只欲分寫數十本藏于諸友之家待數十年之後刊于精舍然傳寫之力亦難誰能辦之

上書牛溪先生問祭禮

公以書問祭禮於牛溪答曰賜喻祭禮程子俱祭考妣朱子只祭一位程朱祭禮各異然鄙人則用程禮矣

遶職還鄉

壬辰

二十年

宣祖大王二十五年〇五十二歲

倭入寇倡起義兵



於海州

時公以前奉事在海州重峯趙文烈公憲倡義湖西傳檄海邑特舉公及金公振綱二人字問其安在諭以挈吾同志共殲姦賊事在抗義新編公遂倡率海州士民為義兵其數五百人

扈 大駕入龍灣

兵既聚方赴難聞 大駕西狩義州募願從者

勤 王

十月特陞司饗院直長

以勤 王功也

**癸巳**二十一年 宣祖大王二十六年 二月陞司圃署

司圃 墓文云本署別提而今從職牒

遣子榮就學牛溪先生

牛溪先生與公書曰賢胤力學清修志業日新後生可畏無如此賢云云

**甲午**二十二年 宣祖大王二十七年 差海西生穀使

歲閱兵火 國用蕩竭募民收粟故有是 命

六月除繕工監判官

八月除同福縣監不赴

十一月除青陽縣監



乙未

二十三年

宣祖大王二十八年  
○五十五歲

正月遶復

命

仍任

八月罷官還鄉

鄭公崑壽抵書於公曰昨日青陽人呈狀於備邊司以為新縣監遭喪而遶請以前縣監朴某為宰本司嘉歎不已而以己罷之官還復非自下所為何不呈疏乃為此呈狀耶外方人不曉事如此而仁峻之去後思良可嘉尚云蓋公之在官只二百四十一日而仁化之及民如此

丙申

二十四年

宣祖大王二十九  
年○五十六歲

配先生于石潭

祠宇

先生石潭之享公實主事蓋公平居日必晨謁家廟間日展拜祠宇退處小齋端拱危坐講習義理之學沉潛研究至老彌篤牛溪先生致書曰君子好學之志日新而不已至於此乎不勝欽歎斂衽敬拜也○朴南郭東說以黃州牧使來訪贈公一絕云家畱石潭潭水下潭上楓林潭底紅欲把黃崗二千石換君秋後石屏風

戊戌

二十六年

宣祖大王三十一年  
○五十八歲

正月錄扈 聖

一等功臣



哭牛溪先生

十二月除軍資監判官

**庚子**二十八年宣祖大王三十七年七月除戶曹佐郎

除平市署令

**辛丑**二十九年宣祖大王三十八年八月陞工曹正

郎

謝官歸松崖

**乙酉**三十三年宣祖大王三十八年四月參錄宣武

原從一等功臣

八月推恩 贈先考戶曹叅議妣淑夫人

成滄浪文濬來訪松崖之溪廬聯床數宵講論

與義因吟呈一絕曰一別三霜今夕會芝顏無

復曩時紅聯床剩得精微語夢罷松濤五夜風

**丙午**三十四年宣祖大王三十九年遺書定祭禮

時制只祭三代而公遺戒後孫令祭及高祖以

遵家禮

**戊申**三十六年宣祖大王四十一歲哭夫人金氏

**庚戌**三十八年光海君二年修同門契

公痛樑摧既久朋友散處易就孤陋遂與同門  
諸賢修契而作序以記之立約束講信儀約以



春秋講會于隱屏精舍又引諸賢先凶者之子  
孫同參其中使亦知父兄相愛之義每歲各出  
斗米補助先生忌祀之需至今累世而無廢焉  
率諸生陳疏請隱屏精舍 賜額

疏公自製也蒙 允賜額紹賢

**辛亥**三十九年 光海君三年 刊行先生文集于紹

賢書院

文集之役實賴牛溪沙溪兩先生之力而至於  
校讎登梓則實由公之盡心敦事也

七月初十日考終于松崖之居第

九月葬于海州治西栗枝坊柯亭里坐艮之原

**丙辰**四十四年 光海君八年 八月追錄衛 聖原從一

等功臣

以光海監國時扈衛之勞也

**戊午**四十六年 光海君十年 贈通政大夫承政院左

承旨兼 經筵叅贊官

是職之 贈蓋錄壬辰原從勳也

**乙卯**皇明 毅宗皇帝崇禎四十八年 國朝 宗 天 王 元

年 豎碣銘於墓所

老峯閣公鼎重銘牧使洪公錫龜書



庚辰

七十三年

肅宗大王二十七年

艮菴李先生喜朝始發

建祠之論

艮菴來莅本牧也嘉尚公學問之深邃有功於斯文倡起多士擬立祠宇於潭院之側經遠未遂○尤菴宋先生嘗曰朴松崖造詣得正豪傑之士也遂菴權先生亦曰朴松崖之尚未建祠實是士林之欠事兩先生之論如此艮菴之欲立祠宇蓋由是也

丙午

九十九年

國朝英宗大王二年

四月觀察使金公相

玉發建祠之論

時金公來拜潭院披看粟牛兩先生文集中有推許公之文字及所著石潭語錄顧謂座中士林曰朴松崖行誼實跡於此兩賢文集班班可考此賢有暇享之所乎對曰未也金公曰南中則如此鄉賢大則書院小則祠宇以此鄒魯士風尚無崇奉之舉豈非欠事乎朴公之有功斯文既如彼而其遺風餘韻尚今未泯至其後孫抗危疏為先生卞誣亦豈非名祖家聲之攸及耶前歲癸卯公之六代孫蕃上疏卞誣被竄會寧故云嗟歎良久更謂諸生曰今日建祠多士之責也士林曰建祠之議



其來已久巡相又有此教其敢不奉承焉  
卜祠基於紹賢書院西墻外

進士姜冕周等呈書于州牧徐公宗一徐公極  
加獎歎幼學李正寅等又呈書于道伯金公相  
玉公題曰朴松崖學行事跡曾於文字上見知  
而祠宇勅建實是美事非但於尊尚朴公之道  
有幸也其在崇奉先生之義倍有光矣於是多  
士定議建祠仍卜基

九月祠宇成

方伯本官皆出力以助成之官給棗盛以爲永

式

十月奉安位板于祠宇

道伯李公溍搆祭文而病未躬臨使其子秉健  
袖祭文以至題位板訖仍與多士行祭畱詩一  
絕而去其詩云想得潭翁緒業傳松崖卽是一  
鄉賢靜嘉俎豆衿紳集盛事從今示萬年初獻  
李斗翼卽栗谷先生傍裔也次云栗翁緒業孰  
能傳認得松崖自有賢此日祠壇墻外築想應  
揖讓似當年其餘和者亦數百餘人多不能盡  
記



**巳酉** 一百二年 英宗大 以趙琴灘光玆追享祠宇

**辛酉** 一百十四年 英宗大王 以朝令毀撤祠宇

朝家有甲午以後新設祠宇毀撤之令多士以祭文告由訖奉位版埋于本祠之後公議至今嗟惜焉

**丙申** 一百四十九年 國朝 正宗 刊行遺稿

公之平日著述盡逸於壬辰兵燹只有若而編後孫瑞東裒粹殘稿就質于漢湖金先生先生校讎仍刊布于世

**巳酉** 一百六十二年 正宗大王 復建祠于松崖舊

址

時 朝禁稍弛遠近祠宇次第復設士林即於松崖舊址脩享如故為其傍於紹賢也因名曰傍賢祠後壬戌性潭宋文敬公煥箕以傍賢書院書額

**庚辰** 一百九十二年 國朝 純宗 立遺墟碑

剛齋宋文簡公穉圭撰并書在傍賢書院講堂前

**庚寅** 二百二年 純宗大王 贈吏曹叅判兼成均

館祭酒侍講院贊善



先是子戊本道儒生李魯敬等上書陳公學行之  
實請加 贈賜諡格不納至是金象淵等復因  
幸行上言如前請 下該曹禮曹判書徐俊輔  
啓曰 特施節惠之典以示崇儒之意允合事  
宜加 贈一款令吏曹稟處吏曹判書徐能輔  
啓曰事體不輕議于大臣處之領議政南公轍  
以為早從賢師聞道志學壬辰之亂倡旅奔問  
為一鄉之矜式標準請 贈亞卿職左議政李  
相璜右議政鄭晚錫之議略同有是 命

乙未

二百七年

國朝 憲宗 大正元年

贈吏曹判書

先是甲午本道儒生李魯傳等以公未準諡典復  
上言申前請 下該曹會 純宗大王 上賓  
未遲施行至是吏曹判書金學淳覆 啓始有  
是 命

辛丑

二百十三年

憲宗 大正七年

賜諡文溫

先是己亥禮曹判書李羲準 啓曰 賜諡一款  
無容更議領議政趙寅永撰諡狀至是弘文館  
應教 金在根議諡文溫文端良靖以文溫 下批○  
諡法博聞多見曰文德性寬和曰溫

四月初七日延

諡于侑賢書院



宣 謚郎韓哲浩題板信川郡守金萬根

**甲辰**

二百十六年

憲宗大  
王十年

立神道碑

梅山洪祭酒直弼撰叅判金洙根書

松崖集卷之三

松崖集卷之四

附錄二

家狀

曾孫進士之望記

公姓朴諱汝龍字舜卿沔川人遠祖諱柱在麗朝  
為神騎都令其後世有聞人有諱諶始事我朝  
官至工部典書晚節為黃海道巡察使秩滿休官  
因家于海州立巖地子孫世居焉是為公五代祖  
也曾祖諱居信登武科官至碧潼郡守祖諱文善  
副司直考諱守義副護軍以公原從功 贈戶曹  
叅議妣平昌李氏 贈戶曹叅議允華之女從



贈淑夫人以 嘉靖辛丑十二月十五日生公公  
年十二叅議公下世翌年淑夫人繼逝公零丁孤  
苦無望成立年十七忽自奮曰既無父母又無所  
學何以爲人自是勵志讀書從師於二十里地逐  
日徒步往來雖值雨雪未嘗小止時以乾醬和水  
救飢而日夜不輟誦讀嘗入神光寺以水筆習字  
抹樓樓板幾至腐朽又摘木葉習字彌數月把筆  
不舍以致手指肉消而骨見 隆慶庚午時年三  
十栗谷李先生以事到海州公往請受業遂以性  
理之學爲務疑必問問必記其於先生一言片辭

苟有啓迪而發則輒錄于日記以爲觀省考證之  
資其他祭儀家法持身接物一以先生爲則 萬  
曆癸酉中司馬兩試時年三十三丁丑先生築室  
於石潭第五曲隱屏之北以爲退修之所公爲其  
從學移家于第四曲松崖溪上距先生聽溪堂只  
隔一少崗因以松崖主人爲號辛巳先生秉東銓  
以公爲 厚陵叅奉寄書曰爲薄宦別泉石固知  
非願而 厚陵往來時可得源源故如是耳蓋先  
生於海西門弟中薦拔者惟公一人而已其後累  
轉陞司圃署別提歷戶曹佐郎繕工軍資兩監判



官平市署令工曹正郎出外爲同福縣監未赴見  
適爲青陽縣監政平賦簡吏民咸悅未幾忤上官  
意罷歸縣民相率而來訴于備局力乞因任不報  
鄭公崑壽抵公書曰青陽人呈狀請以前縣監爲  
宰本司嘉歎而已罷之官還復非自下所爲何不  
呈疏而乃爲此呈狀耶外方之人不曉事如此而  
仁政之有去後思良可嘉尚云公平居日必晨謁  
家廟間日展拜先生祠宇終日正衣冠端拱危坐  
敬對方冊講究義理而無故則不入于內至老如  
一日不少衰焉遠近族屬之年少者率育家內教

誨不怠多有成就者栗谷先生遺稿校讎編次之  
事終始出於牛溪先生而其主管蒐集刊行之役  
則牛溪先生專付于沙溪先生及公公前後稟白  
于牛溪先生者纓纓甚多而先生之所答亦不啻  
百餘紙有曰今番易成草本專荷尊公誠意之篤  
歎仰無量云其見重於牛溪先生亦如此焉 萬  
曆辛亥考終于家享年七十一以扈 聖原從功  
贈通政大夫承政院左承旨兼 經筵叅贊官配  
淑夫人金氏清風望族德溫之女早歸公家賢而  
有婦德勤於女工能致產業公早喪怙恃家事旁



落賴夫人復家業奉先祀接賓客無少缺焉生於  
嘉靖辛亥以 萬曆戊申先公卒享年五十八有  
子一人曰榮服家訓力學篤行受業牛溪先生有  
孫二人長曰承烈少年能文著聞京洛而早歿無  
成次曰成烈生員性剛果直截孝友忠信鄉黨稱  
以長德君子內外曾玄孫百餘人墓在海州治西  
栗枝坊柯亭里坐艮之原淑夫人附焉

行狀

常窩李敏輔撰

公諱汝龍字舜卿朴氏本沔川人高麗初有諱得  
宜官至大丞相有諱述熙諡嚴毅公以開國功封

沔城君自是以後高官顯職繼世不絕有諱諶始  
事我 朝官至工曹典書出爲黃海道巡察使相  
海州立巖地陳荒仍家居焉是於公爲五代祖也  
曾祖諱居信官碧潼郡守祖諱文善副司正考諱  
守義副護軍以公扈 聖功 贈戶曹叅議妣平  
昌李氏 贈戶曹叅議允華之女 贈淑夫人公  
以 嘉靖辛丑十二月十五日生自幼見識早就  
事親甚孝甫十二歲叅議公下世翌年淑夫人繼  
逝當其病革號天泣禱願以身代及居廬終三年  
不食肉事兄奉嫂無異於父母十七忽自奮曰人



而不學何以爲人徒步數十里從鄉先生遂屈首  
讀書不或少懈自是恆加程規益有就將之望每  
於誦讀之際專意爲己不以尋摘爲務嘗讀孟子  
書至楊墨之學盈天下輒掩卷歎曰微孟子則天  
下之人與禽獸無異賴此而人其人正所謂孟子  
之功不在禹下家素貧三旬殆九食猶不輟課業  
飢甚則和醬於水而飲之寓神光寺以水筆習書  
於樓軒軒板幾至朽腐又就樹葉而書之手指傷  
肉猶不捨筆談者不惟公文章亦以名筆期之  
隆慶庚午粟谷李先生解官歸海州公首請受業

時公年三十少先生五歲先生愛公資質之美即  
授以性理諸書公益自感勵有疑必問有聞必記  
治身御家享先接人動遵先生以爲尺度先生嘗  
周覽石潭泉石傲武夷九曲仍築室于第五曲隱  
屏之北以爲藏修之所公爲密邇薰炙亦移居于  
第四曲松崖溪上因以爲號癸酉中司馬兩場先  
生秉銓舉公爲 厚陵叅奉貽書於公曰爲薄宦  
別泉石固知其非願而 厚陵往來時可得源源  
故如是蓋先生或住花石故也戊寅先生勅立精  
舍擬之以大隱屏之號寓其宗仰考亭之意公鳩



材聚石竭力營始先生又擬建朱子祠以靜菴退  
溪躋配規畫幾成赴 召未遂書托於公使卒具  
工公之見重委寄諸門人莫敢先焉甲申先生歿  
公服心喪三年丙戌始建朱子祠配二先生寔就  
先生未了之意其後又追配先生是所謂紹賢書  
院也公嘗夢見先生述大學之旨書贈公公不勝  
悲慕起寫先生所作精舍約束又上牛溪先生書  
請編次先生遺稿辛卯開刊于石潭之院壬辰倭  
虜入寇 大駕西狩龍灣公以前奉事募其願從  
者五百餘人與趙公光玟兼程痛哭進扈 行在

其爲國忠奮觀者偉之後由司饗院直長遷司圃  
署別提判官繕工監由同福縣監轉監青陽縣政  
平事簡不勞而治未幾忤上官棄歸會新官遞則  
縣民訴籌司請以公復爲宰公之莅官才半年仁  
化及民民之去後思乃如此後歷拜戶曹佐郎平  
市令辛丑以工曹正郎謝官歸鄉以辛亥七月初  
十日考終于本第享年七十一三錄原從功一等  
贈承政院左承旨公平居端拱危坐終日不輟講  
習其於天人性命之義沉潛研究老多超悟牛溪  
先生致書曰君子好學日新不已至於此乎重峯



趙文烈公亦曰信有吾友舜卿勵志篤學云每日必謁家廟祭禮一從擊蒙要訣馭婢僕先恩後威未嘗有疾言遽色敦族濟人多人所難及雖未嘗處以師道而後生之及於門者諄諄誘掖期於成立至於親戚可教者皆養於家課學有方多所得名者公自罹樛摧之痛俵俵若無所歸朋友散處恐遺訓荒廢遂倡諸公修契立約以春秋會講又引同志先故者子孫同叅其會每歲令略助先生忌需師友之間情禮兩摯至今累百年不廢者皆公之力也葬于州西栗枝坊良坐原配 贈淑夫

人清風金氏叅奉德溫之女有婦德卒於戊申祔其右焉有一男榮早歿長孫承烈亦早歿次孫成烈登國庠公後裔初頗微弱今不可勝記嗚呼我栗谷文成先生以間世生知之資接紫陽千載之緒道德禮樂肇啓左海文明之運歷選諸儒先莫之與京公則以初年高弟首聞子貢所未聞至言妙論朝夕盈耳所纂語錄多前人所未及發精思質問若陰陽錯綜之變心性離合之妙類皆淵奧浩渺多被先生所印可又與趙重峯同侍函文觀善輔仁切磋交修至於師門凡事靡不用極遺稿



之刊院額之請皆公之所自致誠者而至於紹賢立祠只爲大明儒門嫡傳之統者實先生之志得公而成者也惟公本未盡於是矣欲考其學焉觀於先生之盛而心法規模可知其有授受之正者非後學所敢窺測於乎荷哉公著述不爲不多而盡失於兵燹惟語錄一編附栗谷全書九菴先生嘗曰朴松崖造詣得正真豪傑之士老峯閱相國銘于墓曰自奮爲學來就有道其才可仕從政何有金贊善元行訪公遺址書以贊之曰石潭洋洋松崖在傍正學高風百世可念云吾祖芝村文簡

公爲牧時亦擬立祠宇於先生院傍徑歸未果久之士林發論與公諸孫勗立一小齋金相國鍾秀命名而書之曰傍賢俎豆而侑之噫公之遺風餘徽千載之下其不有興感而發歎也哉歲戊午余就養仲子楊岳任所距海陽近耳門生能華以其後孫袖遺蹟來謁以公行狀有缺請余一言余旣老謝筆硯而諸朴氏具書幣申屬甚勤辭終不獲謹按本狀而敘其一二如此云

謚狀

領議政趙寅永撰

栗谷先生旣沒其門弟子著錄者八十有餘人或



以道學傳或以忠節著以至名德勳業經術文章  
各由所受之淺深所造之高下蔚然皆能有成洵  
東方儒運極盛我先生時雨過化之妙自有不期  
然而然者嗚呼至矣至如朴公諱汝龍卽其一也  
始公五世祖諱諶國初以黃海道巡察使退居于  
海州之立巖子孫因家焉故栗谷先生諱道於石  
潭也公以鄉里子首以師禮事之先生以公天姿  
近道期待之甚重授以性理諸書公薰炙服習以  
爲己之學自任疑必問聞必記自天人格致之原  
禮樂刑政之用與師友間一言一行有關於進修

者輒皆手劄成秩名曰石潭語錄先生之微辭奧  
旨多由是書而著然中經兵燹逸其半今所傳者  
非全稿云又欲從近先生所居以僂從學移家于  
石潭之第四曲松崖溪上因號松崖主人其後勑  
隱屏精舍仍作紹賢書院享朱夫子靜菴退溪兩  
先生卽先生遺志而公成之也追配先生而倡同  
道士疏陳先生學問出處請 恩額得泮施焉至  
先生遺集之役公蓋專任其事殫心竭誠徃復就  
質於牛溪沙溪兩先生者首尾爲二十季所及集  
成而公遂終公於師門亦可謂信之篤服之勤而



關始終者公歿之後遂菴權文純公尚夏芝村李文簡公喜朝首發公俎豆之論而未遑焉久之鄉人士就紹賢之傍立祠享之公字舜卿上祖諱得宜相高麗初後有嚴毅公諱述熙以開國功配廟庭封沔城君遂爲沔川人曾祖諱居信官郡守祖諱文善副司直考諱守義 贈戶曹叅議以公從勳推恩也妣 贈淑夫人平昌李氏 贈叅議允華之女公以 嘉靖辛丑生未成童連丁兩憂蔬食居廬如成人年十七忽自奮然曰吾以零丁之生不學何以自立從塾師於數十里外課日往還

雖雨雪不廢嘗寓山寺習水筆字樓板盡朽又取樹葉而書之指肉消猶不撥其功苦如此癸酉中司馬兩試辛巳先生秉東銓以卓行擬公爲 厚陵叅奉貽書曰爲薄宦別泉石固知其非願而往來時可得源源耳時先生或住坡州之花石亭故也夫海西從先生之門者多矣獨舉公焉則公之見推於先生可知也先生歿即棄歸壬辰倭寇起公以前奉事倡義兵於海州間 上西狩龍灣與同門趙公光珪募願從者兼程勤 王特旨拜司甕院直長轉陞司圃署司圃仍差往海西收聚穀



物由繕工監判官除同福縣監不赴旋出青陽縣  
政平事簡不勞而治未幾忤上官罷縣民訴廟堂  
請復得公爲宰事雖未施公之莅官才二百餘日  
其仁化所及可推也戊戌錄扈 聖原從功連拜  
軍資監判官戶曹佐郎平市署令辛丑以工曹正  
郎謝官歸不出明年又錄宣武原從功辛亥七月  
考終于第壽七十一戊午用原從例 贈承政院  
左承旨 純宗庚寅本道儒生金象淵等上言言  
公學行之實請加 贈令大臣議大臣南公轍李  
相璜鄭晚錫等皆言公早從賢師聞道志學壬辰

之亂倡旅奔問卓有所樹宜有褒嘉特 贈吏曹  
叅判例兼至 當宁乙未又因儒籲該曹覆 啓  
請加贈 贈吏曹判書兼成均館祭酒越五年己  
亥該曹援山林 賜諡之式公 贈爲正二品請  
諡許之於是 朝家尚賢之典始無憾矣公葬于  
州西栗枝良坐原配 贈貞夫人清風金氏叅奉  
德溫之女有婦德先公四年卒祔其右一男榮師  
事牛溪先生早沒側出男策公後裔初頗微弱今  
蕃衍不能記公自樑摧之後俛俛若無所歸與鄉  
中同志倡同門契約以春秋會講叅用先生舊議



作序而識之使此邦之士至今誦先生之澤者公  
之力爲多公家居日必冠帶謁廟喪制一遵擊蒙  
要訣雅不以師道自處而親戚師友之及門者必  
諄諄誘掖多所成就焉公以大賢高弟早聞大道  
之要精思明辨慥慥不已及其年益邵德益茂平  
居終日危坐不輟講習沉潛研究蓋純如也故牛  
溪先生嘗致書曰君子好學日新不已乃如此乎  
重峯趙文烈公憲亦曰吾友朴汝龍勵志篤學其  
所撰述文字宜多可傳者而第其遺集出於斷爛  
掇拾之餘只寂寥數篇而已則今以末學管蠡之

見妄欲窺測於君子狀德之地不已難乎然而以  
語錄所載先生之所答問同門諸賢之所講劄者  
推之其稟質之純進修之勤踐履之篤皆有確然  
不可誣者故尤菴宋文正公時烈嘗曰朴松崖造  
詣得正眞豪傑之士也老峯閱文忠公鼎重銘其  
阡曰自奮爲學來就有道羨湖金文敬公元行贊  
其址曰正學高風百世可忝後賢尊仰推重皆如  
此此可以論太常而節壹惠也歟

墓碣銘

并序

老峯閱鼎重撰

昔我栗谷李先生退而講學于隱屏精舍海西章



甫之負笈請業者踵相尋然槩論諸生所推重師  
席所期許則莫或先於朴公汝龍舜卿者及先生  
復登于朝首舉公爲 厚陵叅奉廩內外諸官皆  
以律已舉職稱晚去官歸老于鄉至今士友間多  
傳其行誼朴氏出自沔川上祖柱始顯麗朝爲神  
騎都令世有聞人入我 朝有諱諶以工部典書  
求外爲海西按使秩滿卜居于海州耕釣自娛引  
老不復起子孫因家焉於公爲五代祖曾祖諱居  
信碧潼郡守祖諱文善副司直考諱守義副護軍  
妣平昌李氏 贈叅議允華之女公生於 嘉靖

辛丑未成童而連喪其父母零丁無依一日忽自  
奮曰吾不力學自立何以爲人遂徒步從師於數  
十里之地不以飢寒而少懈文義日進筆法亦工  
年三十始就學於先生先生授以性理之書公益  
自勉勵疑必問問必記以至師友間一言一行有  
關於進修者輒皆手錄成帙其嗜學篤信如此持  
身齊家奉先接人一以先生爲法遂從先生卜築  
于隱屏西南松崖之溪上仍以自號公三十三中  
司馬兩試四十一始仕轉陞司圃署別提歷戶曹  
佐郎繕工軍資兩監判官平市署令工曹正郎出



爲青陽縣監七十一卒平居日必晨謁家廟間日  
展拜先生祠宇退處小齋整坐看書非有故不入  
于內至老死如一日焉宗族之可教者不問踈戚  
皆養於家課學有方多所成就公有扈 聖勞用  
恩例追榮父母公亦 贈通政大夫承政院左承  
旨配金氏清風望族叅奉德溫之女有婦德勤以  
濟貧祭祀賓客之奉未嘗少缺從 贈淑夫人  
萬曆戊申年五十八而歿葬于州西栗枝里坐艮  
之原後以公窆窆其右而同域焉有一男榮亦志  
學二孫承烈早死成烈生員內外曾玄百餘人公

之平日所記錄盡佚於兵燹惟一冊號石潭語錄  
者行于世銘曰

生也孔艱成之又早自奮爲學來就有道其才可  
仕從政何有耒老而歸不改所守苟無君子斯焉  
取斯我銘其墓惟後之貽

神道碑銘

并序

梅山洪直弼撰

栗谷李先生定居海山之陽大開講授朴公汝龍  
首請受業先生以公慧悟進之以性理諸書公益  
自感奮疑必問有聞必記褫躬御家享先接人壹  
遵先生成法先生嘗以石潭九曲擬諸武夷樹屋



于隱屏而藏修焉公爲密邇熏炙卜宅于松崖仍  
以自號癸酉中司馬兩試先生秉銓舉公爲厚  
陵叅奉先生時在花石亭貽公書曰爲薄宦別泉  
石固知非所願而持被往來可得源源也逮隱屏  
精舍成其擗材陶瓦終始經紀公之力也先生又  
擬泐朱子祠未成而赴召授公規畫俾卒其事  
其所委寄羣弟子莫敢先焉甲申先生歿公心喪  
三年丙戌始建祠祀朱子及靜菴退溪兩賢用就  
先生遺志因以先生配焉所謂紹賢書院也公嘗  
夢先生以大學之旨筆之書以贈公公悲不自勝

手寫揭先生約束于精舍刊行先生遺集遂倡同  
門諸公脩楔立約每春秋集少長以講之蓄餘財  
爲先生助祭至累百年不廢是爲公服勤師門之  
始卒大略也公字舜卿沔川人以高麗大丞相得  
宜爲初祖有諱述熙封沔川君自是珪組繼世至  
諱諶入本朝以工曹典書出爲黃海監司相海  
州立巖地子孫仍居焉是爲公五代祖也曾祖碧  
潼郡守諱居信祖副司正諱文善考副護軍諱守  
義贈戶曹叅議以公扈聖勞也叅議公娶平  
昌李氏贈叅議允華女以嘉靖辛丑十二月



十五日舉公未成童而荐罹內外艱方濟憂革號  
天泣禱願以身代廬墓終喪秉禮孔嚴事兄嫂如  
父母既免喪自奮劬書從鄉先生學曰人而不學  
何以爲人恆立程津專心爲己一日讀孟子歎曰  
微孟子人其禽獸乎益加鞭約家極貧至飲水醬  
以糲飢而不輟功課又工於戳勒而不能辨紙習  
寫於廳板樹葉以致指肉皴傷論者謂公書法爲  
文學所掩平居晨起謁廟間日拜老先生祠退處  
書齋端拱危坐矻矻乎進修喪祭視擊蒙要訣仁  
於宗族急難如流馭臧獲先恩而後威雖不以師

道自任而誘掖後進多所成名一鄉髦士賴而不  
失趨向焉龍蛇之役 大駕西狩公痛哭募兵得  
五百人與同門諸公兼程勤 王仍赴 行在其  
奮忠捍國者如此後由司饗院直長遷司圃署別  
提繕工軍資監判官由同福縣監改授青陽政平  
事簡不勞而治未幾棄歸後拜戶曹佐郎平市署  
令以工曹正郎謝官歸鄉辛亥七月十五日考終  
于本第壽七十一葬于州西栗枝坊艮坐配清風  
金氏德溫之女壺範極備卒於戊申祔右男榮榮  
男承烈俱承烈弟成烈進士兩房後承蕃衍殆



不可勝記嗚呼 本朝自 中明以后羣哲繼作  
凜凜向彬彬之風而人文猶有所未暢至栗谷先  
生出而始盡開荒闢陋道德文章進退行藏粹然  
一出於中正所以爲左海之孔子也公最先樞衣  
得聞子貢之所未聞若陰陽錯綜之變心性離合  
之妙發其精蘊被先生所領可又與沙溪金文元  
公重峯趙文烈公并跼三席交修胥訓以成其德  
業觀先生心法授受之真而公之爲公亦可知矣  
於乎休哉牛溪成文簡公亟稱公之好學日新不  
已重峯字公曰舜卿勵志篤學九菴宋文正公雅

言松崖造詣得正真豪傑之士老峯閱文忠公銘  
之曰自奮爲學來就有道其才可仕從政何有羨  
湖金文敬公訪公遺墟而歎曰石潭洋洋松崖在  
傍正學高風百世可念芝村李文簡公牧海州亦  
擬立公祠于紹賢院傍旣成名之曰傍賢俎豆而  
侑焉公始以原從勳 贈承政院左承旨後屢  
贈至吏曹判書兼成均館祭酒侍講院贊善 賜  
諡文溫 朝家之所褒崇羣賢之所闡揚亦云盛  
矣然苟非公爲君師盡分亦何以致此哉公後孫  
致煥方謀豎牲石來謁銘不倭竊誦公風義甚夙



不敢辭力疾而序之繼之以銘曰

允文文成倡道大東展拓開豁爲羣儒宗首事函  
丈有松崖翁與聞性道如應撞鍾願言奔軼步趨  
是從爲之先後如端木公聞難灑泣自許孤忠倡  
義提兵從于濟宮凡厥有生孰無君師鮮能盡分  
如公之爲退遂初服左矩右規里飽厥德鄉誦其  
辭一體同祀傍賢之祠遺風餘韻曠世不衰崇秩  
易名 聖朝攸賜龍光炳烺泉隧增輝貞德之符  
百世不違後昆蕃昌即天報施柯亭之山光氣葳  
蕤繫公全歸永寧在茲淵邱雖易尚無耕菑我薦

石章以昭以貽匪公之以文成之思

遺墟碑

剛齋宋稗圭撰

石潭九曲之第四曰松崖朴公諱汝龍從學于李  
文成先生築室於斯仍以自號焉公字舜卿沔川  
人工曹典書諱諶其五代祖也出按海西遂奠居  
于海州公早失怙恃零丁無依能自奮力學不以  
飢寒而廢業及依歸師門得聞爲己之說則益勵  
其志於性理諸書講究不懈先生之所期許同門  
之所推重在海西無出公之右年三十三中 萬  
曆癸酉司馬兩試四十一先生秉銓舉卓行除



厚陵叅奉六十一以工曹正郎謝官歸老于松崖  
七十一而考終其監青陽縣爲政清簡未周年忤  
上官意罷歸民有去後思壬辰之亂公以前奉事  
倡義旅扈 駕于龍濟錄勳追榮父母後公亦  
贈左承旨公侍先生日記其所疑問及先生訓辭  
名曰語錄惜乎逸其半猶可以見公爲學之大槩  
而亦多有開發於後人者先生沒牛溪先生屬沙  
溪金文元公編摩遺集公實同其役而校讎剞劂  
終始盡心先生嘗欲祠朱子于五曲隱屏下配以  
靜菴退溪兩賢適赴 召在京托以經紀其事未

及成而山頹公竭其誠力卒如先生之志後又追  
配先生且草疏率諸生請額而蒙 允今之紹賢  
書院是也嗚呼公少而劬書立心超凡壯而志道  
遂師大賢莅官而愛民遭亂而勤 王又不負先  
生所薦用此其資質之過於人踐履之得於學而  
講習研究之工至老彌篤則牛溪致書歎歎好學  
之志日新不已我先祖允菴文正公亦嘗稱其造  
詣得正而惓惓訪問其後承有無若遂菴良菴諸  
賢皆以俎豆之遲爲欠事荷歟盛哉欲知公者觀  
於斯庶可得矣今公遺墟士林已建祠享之而諸



後孫復欲立石以表之屬余識其陰謹書之如此

傍賢祠記

道伯李洪載撰

孔子作於魯顏曾冉閔並其里巷之秀朱子作於  
閩八室之徒強半環武夷而生者豈惟陶鑄之力  
哉殆亦風氣然也夫惟豪傑之興也餘氣之所鍾  
尚萃於其鄰伍豐沛之貴人南陽之名士即其徵  
也况聖賢之餘哉栗谷先生我東之孔朱也方其  
倡道於石潭也鄉閭搢衣之士非不蔚然盛也獨  
松崖林公琴灘趙公特居其選蓋其篤學力踐均  
被先生之獎與而先生之書亦成於二公之手當

是時沙溪重峯二先生居則典禮出則忠烈並惟  
先生之道是明而至若二公之藏修講磨專是石  
潭之餘杖几琴瑟之奉倚之而益尊殆先生奔走  
先後而儼乎其左右侍也使先生而獨享於石潭  
二公之配食其傍如月川之於陶山也夫孰曰不  
可然墻傍之祠猶且作撤也忽二公之靈朝躋而  
優夕降也可勝惜哉然士林之公議久而益張復  
即其遺址而祠之請名於太學士金公鍾秀為其  
傍於紹賢也命之曰傍賢祠既卒享多士屬洪載  
為記洪載竊惟祠院所以倡作人也然士可待倡



而作耶孟子曰待文王而興者凡民也若夫豪傑之士不待文王猶興待文而興猶謂之凡民况祠院之待耶俎豆簠簋之末而遺其本祠院一空器爾紹賢雖尊猶不足以作人况傍賢哉然道無小大明之在人苟能推二公之學上躋先生之道禮樂文章名節事業惟夫人之所自取而吾道賴之益明矣然則傍賢優於作人况又重之以紹賢哉大德微其餘小德微其始等之乎其作人也審如是也西士之作徵於二公二公之作徵於先生先生之作徵於孔朱可矣祠其不足倡耶既已書諸

扁以論夫多士

贊

書與公之後孫慶履

漢湖金元行撰

石潭洋洋松崖在傍正學高風百世可忘

請加 贈賜謚書

伏以臣等所居之地即先正臣文成公李珣講道之所也誦先正之書服先正之訓至于今二百有餘年衣縫掖而挾方冊者尚知有窮理正心之學蓋先正倡明導率之功於斯為盛而賢弟子羽翼發揮之助亦有所不可誣也先正之設教于石潭也海之人士負笈登門者甚眾而嗜學篤行深為



先正所期許者惟故正郎 贈左承旨臣朴汝龍  
爲最汝龍卽工曹典書諱五世孫也蚤喪父母零  
丁無依一朝忽自奮曰人而不學何以爲人遂徒  
步從師於數十里地忍飢劬學文義日進嘗讀孟  
子書至楊墨之言盈天下輒掩卷歎曰微孟子則  
天下之人未免禽獸之歸矣及依歸先正得聞爲  
己之說則益自砥礪孜孜用力於性理諸書揆索  
微奧蚤夜不懈疑必問問必記持身齊家奉先接  
人一遵先正成法先正之秉東銓特舉卓行歷內  
外諸官皆以律己舉職稱先正旣沒稟于文簡公

臣成渾遂與文元公臣金長生編摩遺集終始致  
力而他門人莫得與焉及壬辰之亂 鑿輿倉卒  
西狩朴汝龍時以前奉事在海州聞之痛哭倡義  
士五百人扈 駕入龍灣亂甫定朴汝龍年猶未  
至謝官歸老與同門諸人修契立約講明舊學每  
於先正忌辰助備祭需致其終身嚮慕之誠其子  
孫迄于今遵守不替有所撰先正語錄經亂放失  
厘存其半而尚可以闡發精蘊垂諸後世若其造  
道之淺深成德之高下固非臣等謏寡所敢窺測  
而第考諸前後儒賢之推翊稱述者則文簡公臣



成渾之言曰君子好學之志日新不已文正公臣  
宋時烈之言則曰造詣得正豪傑之士文敬公臣  
金元行之言則曰正學高風百世可忘文忠公臣  
閱鼎重銘墓之文則曰自奮爲學來就有道其才  
可仕從政何有未老而歸不改所守苟無君子斯  
焉取斯至於文純公臣權尚夏文簡公臣李喜朝  
倡起多士建祠之論凡此諸賢皆是儒林之宗匠  
朝廷之碩德則其言確而有徵豈容臣等之贅一  
辭於其間哉且昔先正嘗欲勅朱子祠於所居五  
曲隱屏之下配以先正臣文正公趙光祖文純公

李滉仍定規約而適赴 召命未及始事付書於  
汝龍經紀其役未幾先正下世朴汝龍獨殫竭誠  
力卒成先正之志而後又追配先正請額蒙 允  
以爲諸生藏修之所永收一方興勸之效此尤朴  
汝龍之效力於師門而冠儒服儒之倫所以到今  
誦慕而不衰者也臣等竊伏念我 國家右文爲  
治凡在崇儒重道之方靡不用極生而勤 旌招  
之禮歿而賁 馳酌之典由是教化休明名賢輩  
出浸淫乎洛建之盛此誠我 邸下所當善述而  
恪遵也今朴汝龍之學行之篤也如此朴汝龍之



有功於斯文也如此朴汝龍之見重於尚論也如此而位止末蔭未克展蘊既沒之後僅以執鞞之勞贈三品職若其德行之實未聞有揄揚之舉茲豈非聖朝之闕事哉臣等生長本道自謂於珥受罔極之恩而得珥之門升珥之堂紹修遺規倬然爲後學標津者環首陽以西惟汝龍一人而已臣等徒僭越是懼不以上聞則是使我邨下尊賢之盛德闕而不章也茲敢不避鈇鉞相率褻足謹以實蹟頌末仰誦于七旒之下伏乞高明勿以臣等賤微而特垂採聽仰稟大朝亟

下此章於有司俾議表章之道馳以隆秩錫以美諡俾一路衿紳有所觀感興起則此非獨臣等區區之私幸也臣等無任屏營祈懇之至謹昧死以聞

鄉賢祠奉安祭文

西墻外奉安時

道伯李漵撰

惟茲石潭栗翁武夷一區絃誦孰無變移于時我公寔先束脩誰敢望回師曰起予蓋公氣質早已超詣幼失怙恃奮然自勵徒步尋師嗜學如狂念飢念渴日就月將餘事詞章不力而工及歸賢門慕愛無窮移室潭西日以陪侍一言一動靡不記



識鄉黨一篇未足爲喻眷眷服膺動遵其規修齊  
克復能有發揮一命之官亦見存心區區縣紱豈  
其所淫一笑而歸皓髮松崖詩書舊味至死彌佳  
鄉稱其德士許其仁沒而祭之豈非斯人睠焉潭  
上六賢同祠惟公平生拜跪於斯多士齊心別起  
旁屋妥以公靈享以醴帛築場餘誠永有所寓秋  
月寒水亦愜心素日吉辰良縟儀斯舉左右先師  
庇庥後生庶幾千古母墜芳聲

撤享時祭文

縣監李鎮五撰

惟公天賦卓犖早從賢師學有所得雪消孔爐雨

潤顏巷渾平繩直卓彼松崖月涵秋水一般洒落  
回琴點瑟絃歌一壑玉流九曲以其所有惠我後  
人貪廉懦立遺風餘韻百世不泯山高水闊慕切  
羹墻謀同祭社公議不滅鬱鬱隱屏有舍翼然制  
倣白鹿謀度經始公昔尸之承命師席於焉立祠  
以侑我公蓋追平昔游夏濟濟惟德不孤趙公如  
玉飛甍上下列侍閭如揖讓如昨蕉丹荔黃禴祀  
長存歲歲無斁世道不幸俎豆混淆震雷有激  
先朝定制炳如日星并禁新設羣庠旣撤鄉塾亦  
混士林抑鬱青衿宿春控訴徒勤奈有令甲芬苾



既缺翬飛又毀林壑悽色今奉神板將埋于地潭院之側輿情共苑日月可仰庶幾他日

傍賢書院奉安祭文

常窩李敏輔撰

文成之作左海光晶如岱于山如斗于星摳衣執筴四方攸宗云誰拔萃猗松崖翁崖翁名閎麗季節義起自孤童蚤篤為己歸依光霽壹循繩尺築室于傍服勤晨夕脩塗大車鞭以良騏河飲獲飽豢嗜忘飢周旋函丈既專而久惟宮墻峻暨倉廩富性命彝倫妙訣微言默識詳記聞他未聞譬孔則貢若謝於程有煒遺編巍列其名淡造者學挺

特其質疏水矢樂匪心軒紱偉型彪輝庇余西鄉溯懷水央百世敢忘祭社之禮允稱羣情中經作撤一甲奄夏禁日稍弛事若有待公議齋奮新棟重灑謀即宅址鄰亦師院髣髴臯比隅坐開卷維月照潭維水在地維永無斁于千萬禩敬簡吉辰俶薦鋤豆伊始自今丕垂啓佑

春秋享祝文

西墻外奉安時

道伯李凜撰

性自近道能得賢師依倚師靈芬苾永世

又

重建時

道伯李洪載撰

性本溫粹學自超詣祠近賢院一體其祭



贈亞卿焚黃祝文

維歲次庚寅十二月十五日亥孫致滄敢昭告于  
顯八代祖考 贈通政大夫承政院左承旨兼  
經筵叅贊官行通訓大夫工曹正郎府君顯八代  
祖妣 贈淑夫人清風金氏之墓去戊子秋一道  
之人以府君 贈職請諡事伏閤己丑春又上言  
入 啓 聖上下其事于禮曹禮曹覆 達以正  
二品加 贈一款令吏曹稟處吏曹覆 啓以超  
階之 贈事體不輕議于大臣處之諸大臣收議  
今十一月十五日 特贈嘉善大夫吏曹叅判兼

同知義禁府事成均館祭酒侍講院贊善五衛都  
摠府副摠管 贈淑夫人金氏職 贈貞夫人竊  
念府君道學事功見重於大賢而不肖孱劣不能  
擅揚大懼埋沒於無聞幸以公議不泯克闡懿德  
竟蒙崇獎之典上可以光飾先德下可以覆庇後  
昆誠不勝大幸今將所下 誥命以展焚黃之儀  
感祝涕泗不知所告謹以酒果用伸虔告謹告

贈正卿焚黃祝文

維歲次乙未十月十二日亥孫致默敢昭告于顯  
八代祖考 贈嘉善大夫吏曹叅判兼成均館祭



酒侍講院贊善行通訓大夫工曹正郎府君顯八  
代祖妣 贈貞夫人清風金氏之墓去甲午秋一  
道之人以府君加 贈請諡事上言八 啓 先  
朝下其事于吏曹吏曹未及覆 啓而 仙馭上  
賓遷就未遲今九月十四日該曹覆 啓十八日  
特 贈資憲大夫吏曹判書兼知義禁府事成均  
館祭酒五衛都摠府都摠管竊念公議不泯克闡  
懿德竟蒙節惠之興士林聳動子孫感泣今將所  
下 誥命以展焚黃之儀因此歲祀兼告事由彌  
增感慕謹用清酌時羞祇奉常事尚饗

松崖集跋

李文成先生處于海也一時鄉黨俊秀問業者甚  
衆而松崖朴公始終服勤其間學忠勇出處志事  
挺然章明于世不佞之攝乏持節是邦也即走謁  
石潭之紹賢書院而院之南有祠曰傍賢蓋揭虔  
公而俎豆之也後十年公之後孫相允甫賣其祖  
所纂次公遺文若諸長德先輩所述銘誄碑版爲  
一卷者徵余有以志之余遊宦四方卒卒莫之就  
者且幾年今其胤子昌廈又崎嶇訪到於西京冰  
雪之中矣夫以不佞畢生乾沒顧安能爲役於此



而生三死一之訓蓋嘗奉教於君子矣自甲申奠  
楹之後謠啄蟪蝼與夫虬蟉之撼廩廩乎其晦蒙  
太清矣而公於師弟子之義庶幾盡其倫焉則斯  
已足以關鍵柱棟斯文有不待乎零編斷簡之傳  
不傳焉而誦其詩讀其書而不知其人非聖人所  
嘗可也後有求知公者亦捨是書奚以哉公諱汝  
龍官正郎屢 贈至冢宰祭酒贊善諡文溫嗚呼  
朝家崇報之典亦盛矣

崇禎紀元後四己酉仲冬崇政大夫行平安道觀  
察使兼兵馬水軍節度使都巡察使管餉使平壤  
府尹後學楊州趙斗淳謹跋



松崖集跋

松崖朴公潭門高弟也學問德業爲世矜式而惟以遺集之未及刊行學者之齎嗟久矣昔我曾王考文敬公嘗因其蒐輯略加刪正將弁首而未果今其後承懼夫愈遠而愈失其傳謀付剞劂氏請序于鷺湖洪丈而謂余是文敬後人使尾一言于下顧惟淺識復何贅爲竊念龍蛇之歲島夷猖獗乘輿播遷公慷慨倡義奔問行在貞忠卓節炳如日星雖在千載之下猶將聞風而興慕斯豈非淵源授受之所由得者乎至若盡心所師倡同志



而享俎豆蓄財力而餽文稿何莫非人所難能而  
在公特餘事耳今以寥寥數篇詎識公幽光潛德  
之萬一而公既以文成爲之師文敬選其書洪文  
序以文則其精神心術之所在出處事爲之大致  
昭然如指諸掌矣孟子曰誦其詩讀其書不知其  
人可乎吾於公亦云

崇禎紀元後四庚戌孟春嘉義大夫吏曹叅判原  
任 奎章閣待教安東金洙根謹跋

松崖集跋

士生斯世其最樂而甚幸者莫如游聖人之門夫  
宇宙至鉅也億兆至衆也其間有特立獨行之士  
奇材異能之人或崇名節以視其躬或修文辭以  
見其志者蓋肩相比也然或泯湮而不克顯焉獨游  
乎聖人之門者不然雖無一言之可述一節之可  
稱者苟其名一登於聖人之書即皆竟萬世宗之  
表之焜耀而不朽今之爵以佚伯俎豆乎聖廡者  
皆是也雖然生與聖人並世蓋千載而一遇之幸  
遇之而得登其門而聽其緒論者又千萬而一二



也其千萬而一二者又未必皆傳也登孔門者三千而身通六藝者厯止於七十有二人是又何其難也其薰炙私淑之餘傳述其舊聞發摭其新得用之身心措之事爲可以翊世教而燾來裔者必殷乎盛矣而自經禮所載以外殆無一言之可述一節之可稱者嗚呼豈其然哉然而如是者其亦湮湮焉已矣其傳之之難又何爲若是其甚也斯固古人之不幸而後人之所大恨也栗谷先生吾東之聖人也大賢宏儒之出於其門者指固不勝擗而乃松崖朴公傑然爲高足先生嘗以卓行薦公

于朝凡性命理氣之蹟學術政法之要莫不與公而講焉卽此可以知其賢矣夫如是則雖無一言之可述一節之可稱者猶將宗之表之竟萬世焜耀而不朽况自奮而力學勇也擇師而知所歸智也募兵倡義赴國家之難忠也不卑小官盡職而慈民仁也事師殫誠如愛父兄以至於校讎遺文營建祠院服勤終始無憾而後止義也具茲衆善斯已多乎一節之可稱矣但其著述經兵燹散失得爲文者厯七篇其石潭語錄一卷亦佚其半而不全嗚呼惜哉使公平生著作悉收而并存



焉則其所以嘉惠后學者豈若是寂寥而已耶雖  
然譬諸一言之可述者則亦已多矣而又奚憾乎  
即其存者護惜而尊奉之俾不重歸於泯湮則後  
學者之責也公集舊有刊本間多潦率而未賅者  
又祠院之輟而復設及加 贈賜諡之實俱不及  
登焉公之諡孫謀所以重鏗也使其族能泗相駿  
來問余爲之跋余謂公之可以不朽者不在乎文  
章文章固公之餘事爾然而後之欲不朽公者亦  
不得不藉是而先之也余伯父淵泉先生嘗亟稱  
公賢公之請諡也蓋倡議而勸成之又欲爲公撰

神道碑病未果今是集之跋余固不敢以蕪拙辭  
謹爲之言如此云

崇禎紀元後四庚戌仲春通訓大夫行弘文館副  
校理知製教兼 經筵侍讀官春秋館記注官豐  
山洪祐健謹書



崇禎紀元後四庚戌季春重刊

松崖集卷之四終



